



Inatsisartunut ilaasortamut
Doris J. Jensen
Siumut

23-01-2024
Suliap normua 2023 - 30218
Allakkiap ilisarnaataa 23770791

Postboks 260
3900 Nuuk
Oqarasuaat (+299) 34 50 00
Nassitsigasuaat (+299) 34 66 66
E-mail: ian@nanoq.gl
www.naalakkersuisut.gl

Meeqqat akornanni akilersilluni aaqqissuussaasumik nunatsinni atoqateqartarneq pillugu § 37 naapertorlugu apeqqummut nr. 186-2023-mut akissuteqaat

Asasara Doris J. Jensen.

Apeqqutinut qujanaq. Apeqqutit tullinnguuttut ataasiakkaarlugit assilineqarsimapput, akissutiniq tulleqarlutik.

1. Imatut paasisariaqarpa, meeqqat akornanni akilersilluni aaqqissuusaasumik atoqateqartoqartartoq?

Isumaginninnermut Aqutsisoqarfiup katsorsaanissamik neqeroorutaa, meeqqanik katsorsaasut angalasartoqatigiit illoqarfinni assigiinngitsuni arlalinni suliniuteqarnermikkut meeqqat inuusuttullu atugarliortut ilai, ilaatigut imigassat aalakoornartortallit, cigaretit, atisat aningaasallu pillugit timimikkut tarnimikkullu imminnut killissaminnik qaangiisarnernannut tunngatillugu pisoqartarneranik ilisimasaqalersimapput. Meeqqat atugarliortut sunnertiasullu pissusilersornerat akilersilluni atoqateqarnertut taassallugu pissusissamisoornanilu eqqortuunngilaq.

2. Sisimiuni atugarissaarnermut immikkoortortaqarfiup qanimut suleqatiginnissimanginnera qanoq nassuiaatissaqarpa?

Ukiumoortumik nalunaarusiaq *Meeqqanik katsorsaallutik angalasartut Sisimiut, 2022 – 2023, Ukiumoortumik nalunaarusiaq* issuarneqarpoq:

"Sisimiuni isumaginnittoqarfik qanimut suleqatigineqanngilaq. Oqartussaasut immikkoortortaqarfiat pitsaasumik attaveqarfiginiarnera unamminarsimavoq taamaattumillu meeqqat pillugit suliart arlallit qulaajarnissaat ajornakusoorsimavoq. Suliamik suliarinnittartumik nutaamik aatsaat atorfinitsitsinerup kingorna qanimut suleqatigiinneq pilersinneqarsinnaasimavoq. Sulianik suliarinnittartup taassuma Meeqqanik katsorsaallutik angalasartunut nalunaarutiginninnerit apeqqutillu pingaarnertut suliarisarpai. Suliart taakkua malinnaaffigineqarneri ingerlaavartumik tassannaanniit uppersaasnerit tiguserpavut. Sulisoq taanna piffissap sivikitsuinnaap ingerlanerani suliuinnaarpoq tamannalu suliaqarpallaarnermik peqquteqarpoq, tassami sulisumut ataatsimut suliaassarpasuit tunniussuunneqartarsimapput.



Oqartussat immikkoortortaqarfiat meeqqat suliassartaannik amerlasoorparujussuarnit tatineqarsimasoq takuneqarsinnaavoq. Suliaqarfinit allanit nalunaaruteqarniarneq tunuarsimaarfigineqartartoq aamma eqqaassallugu unamminartuuvoq, tassami suliat malinnaavigineqarnissaannut arlaannaataluunniit upperineq ajorpaa aamma suliat politiinut tunniunneqarunnangimmata imaluunniit allatut qisuariarfigineqarunnangimmata. Meeqqanik katsorsaasut angalasartut tamanna aamma ilisarinnavaat. Ilaqutariit arlallit isumaginnittoqarfimmi suliassartallit paasissutissanik amigaateqartarneq, suleqatigineqarnerlu ajornertik aamma isumaginnittoqarfimmi attaveqaatit ataatsimeeqateqarneq ajornertik pakatsinaralugu oqaluttuortarput. Ilaqutariit arlallit isumaginnittoqarfimmi suliassartallit aamma oqartussat immikkoortortaqarfiata meeqqat suliassartaannik sularinnittarnera aamma pakatsinarisarpaat (...)."

Atugarissaarnermut immikkoortortap meeqqat pillugit angalasartoqatigiit suleqatigilluarsimagaat Qeqqata Kommuniaril ilisimatitsissutigineqarpoq, pingaartumik akuersissutinik pissarsiniarnermut atatillugu. Piffissamili sulisunik taarseraattoqarnera immikkoortortaqarfinnilu ataasiakkaani sulisussanik amigaateqarneq pissutaallutik kommuni saaffiginnissutinik akissuteqartarnissaminut ilungersunartorsiorsimavoq. Qeqqata Kommunia allappoq:

" (...) Meeqqat pillugit angalasartoqatigiit kommunip allaffeqarfianut attaveqartarnerat aqutsisoqatigiinnut pinnani sullissisunullu attaveqartarneq ingerlaneqartarsimammat, kommunip allaffeqarfiani paasissutissat ataqaqatigiissarneqarnerat pitsaanngitsumik kinguneqarsimavoq."

3. Qeqqata Kommuniaril immikkoortortaqarfinnut nalunaarutiginninnissamut tunuarsimaartoqartarsimanera qanoq iliuuseqarfigineqarniarpa?

Kinguaassiutitigut kannguttaatsuliortarnernik atornerluisarnernilluunniit nalunaarutiginnittoqartarnissamut Qeqqata Kommunia ajornartoormi upalungaarsimanissamut pilersarusiorsimavoq, tassani pisoqarsimatillugu akuliussimasut tamarmik, matumani atuarfik, ulluunerani paaqqinnittarfiit, peqqinnissaqarfik aggersarneqartarput tamatumalu kingorna politiinut nalunaarummik tunniussisoqartarluni. Taamaammat suliame taama ilungersunartigisumi sulisoqarsimappat saaffiginninnissaminnut tunuarsimaartarsimasunik tamanna Qeqqata Kommuniata tupigusuutigaa, tamannami meeqqat tapersersorneqarnissaannut inatsit naapertorlugu pisussaaffiuvoq.

Meeqqat tapersersorneqarnissaannut inatsit naapertorlugu siunissami kommunimi sulisut nutaat nalunaaruteqartarnissaminnik pisussaaffik sakkortunerusoq pillugu kiisalu kinguaassiutitigut kannguttaatsuliortoqarneranik atornerluisoqarneranilluunniit pasitsaassaqarnermi ilisimasaqalersimanermiluunniit saaffiginninnissaminnut periarfissat pillugit ilitsersorneqartassasut Qeqqata Kommunia allappoq, taava kinguaassiutitigut kannguttaatsuliortoqarneranik atornerluisoqarneranilluunniit nalunaarutiginninnerit pillugit kommunip ajornartoormi upalungaarsimanissamut pilersarusiaa malillugu saaffiginnittoqareernerup kingorna erngertumik iliuuseqartartassammat.

4. Sulisut ilisimasaqarlutik iliuuseqartarsimangippata, kinguneqartitsisoqassava?

Qeqqata Kommunia ilisimatitsivoq, inatsit malittarisassallu malinnagit sulisoqarnerminik ilisimasaqarani. Kommunip ilassutigaa sulisunut malittarisassat naapertorlugit sulisup pisussaaffimminik sumiginnaappat siullermik mianersoqqusisoqartassasoq.



Inussiarnersumik inuulluaqqusillunga


Aqqaluq B. Egede